

Nerea Rodríguez Regueira

nerea.rodriguez.regueira@gmail.com

Antía Cores Torres

antia.cores.torres@usc.es

Grupo de Investigación Stellae (USC)



ISSN: 1132-8932

Páx. 80-81

## EXPERIENCIAS



• **LGx15 Ideas para o futuro da lingua** (<https://lgx15.gal/>). Proxecto para a difusión de ideas relacionadas co futuro da lingua galega que se iniciou no ano 2015, organizado pola Coordinadora de Traballadores/as de Normalización da Lingua Galega. Cunha gala de periodicidade anual, en LGx15 interveñen diversas persoas para transmitir, mediante charlas de quince minutos, ideas e reflexións sobre o uso e prestixio do galego e as actitudes e comportamentos lingüísticos, procurando cambios e accións. Na súa páxina web poden consultarse en vídeo todas as intervencións dos últimos anos.



• **Pereiriños** (<https://es.calameo.com/subscriptions/3447559>). Boletín informativo da Biblioteca "Xosé Neira Vilas" do CEIP do Foxo (A Estrada) que contén unha gran cantidade de recomendacións de lecturas para diferentes idades ("Un Nadal de libros", "Un verán de libros"). Así mesmo, compila as homenaxes que se fan neste centro a persoeiros vencellados coa cultura galega e tamén recolle unha breve explicación acompañada de imaxes dos proxectos que cada ano se realizan neste centro educativo. Na plataforma Calaméo poden consultarse os 225 números que se editaron dende o ano 2005.



• **Viaxe ao reino das emocións** (<http://mundodemilu.org/es/20>). Material da Fundación Meniños sobre educación emocional dirixido a alumnado de Educación Infantil e dispoñible de xeito gratuíto para os centros galegos. O material inclúe unha guía para o profesorado, fichas de actividades e material complementario. O proxecto tamén conta cunha canción composta polo músico coruñés Pablo Díaz.

## FERRAMENTAS



• **Rapaciñ@s**: a tecnoloxía ben segura (<https://rapacinos.gal/>). Iniciativa impulsada polo Colexio Profesional de Enxeñaría en Informática de Galicia (CPEIG) e a Axencia para a Modernización Tecnolóxica de Galicia (AMTEGA) cuxo obxectivo é que familias e docentes accedan a información e recursos educativos para acompañar ás fillas/os e estudantes na utilización das novas tecnoloxías. O programa organiza charlas sobre o uso da Internet e as redes sociais, actividades lúdicas sobre aplicacións interactivas que favorecen a aprendizaxe colaborativa e o desenvolvemento da creatividade, e tamén difunde casos de éxito que promovan a incorporación das mozas ás novas profesións dixitais para contribuír á desaparición da fenda de xénero.

• **European Schoolnet Academy** (<https://www.europeanschoolnetacademy.eu>). Plataforma de formación continua online para facilitar a aprendizaxe e desenvolvemento profesional do profesorado europeo xurdida a partir da organización *European Schoolnet* que aglutina 30 ministerios de educación da UE. Dentro desta plataforma podemos atopar cursos presenciais na súa "Future classroom lab", im-

partidos en Bruxelas e con posibilidade de obter unha bolsa para a súa asistencia a través de Erasmus+ “Key Action 1 – Mobility of individuals in the field of education and training”. Tamén conta cun programa de formación en liña a través de diferentes MOOCs (impartidos en inglés). Este ano dende o CAFI ofrécese a posibilidade de participar nunha das súas formacións, concretamente no “EU Code Week Deep Dive” que pretende axudar as/os docentes a adquirir coñecementos sobre o pensamento computacional e o código para participar na “semana europea do código” que se celebra anualmente no mes do outubro.

- **Fiesta** (<https://fiestra.gal/>). Plataforma dixital da Academia Galega do Audiovisual que promove a utilización de audiovisual galego como recurso pedagóxico para a educación en valores nos centros de ensino de educación primaria e secundaria. A páxina web pon a disposición dos centros un catálogo de curtometraxes galegas que van acompañadas de recursos didácticos para traballar nas aulas.

## NON DEIXES DE CONSULTAR...

- **Guía para a produción e uso de materiais didácticos dixitais. Recomendacións de boas prácticas para produtores, familias e profesorado** (<https://riull.ull.es/xmlui/handle/915/16086>). Recurso elaborado a partir dos resultados do proxecto de investigación estatal *Escuel@ Digit@l*, no que participaron investigadores e investigadoras de Canarias, Galicia e Valencia, cuxo obxectivo foi analizar a produción e utilización dos materiais didácticos dixitais deseñados para a educación primaria. Nesta guía, dividida en catro capítulos, recóllense recomendacións tanto para os produtores destes recursos (empresas, administracións e asociacións docentes) como para o profesorado, as familias e o alumnado.

- **“Guía de ferramentas TIC útiles para maestrxs”**. Dossier colaborativo elaborado por 50 contas educativas de Instagram no que se poden atopar máis de 100 ferramentas TIC para empregar no día a día da aula e/ou na ensinanza online. O dossier está organizado en 5 categorías: (1) Ferramentas para o/a docente. Inclúense ferramentas de organización, plataformas para crear aulas virtuais, páxinas para a creación de contidos, realización de videochamadas, etc. (2) Xogos e actividades. Neste epígrafe aglutínanse apps, páxinas web e ferramentas diversas para a creación de materiais didácticos que poden ser empregados tanto presencialmente como na ensinanza telemática. (3) Gamificación e avatares. Inclúense software, programas online e apps para a creación de propostas de gamificación e avatares. (4) Atención á diversidade. Ferramentas que permiten aos docentes adaptar os seus materiais á diversidade existente na aula. (5) Google. Inclúense diferentes ferramentas de Google que poden ser aplicadas no contexto educativo. É posible acceder ao dossier de xeito gratuito a través de calquera das contas de Instagram que participaron na súa elaboración. Pódese consultar a lista das mesmas na conta de @teaching\_everyday organizadora do dossier e encargada da súa maquetación.

- **Radio Picariña** (<http://www.crtvg.es/en-directo/canles-directos-rg/radio-picarina>). Canle dixital de música infantil e xuvenil, integrada na marca Xabarín Club da CRTVG, que pon a disposición dos oíntes unha selección de máis de mil cancións en lingua galega ordenadas de forma alfabética polo título. Inclúense temas de Mamá Cabra, Alonso Caxade, Pablo Díaz, Sara Vidal, Cé Orquestra Pantasma, entre moitos outros.

- **O moucho voa**. Novo programa de Radio Neria no que o mestre Miguel Vázquez Freire nos achega pímulas filosóficas. Conta cunha duración de 10-15 minutos e coa participación de voces da comarca de Fisterra que axudan a poñer en escena situacións nas que a filosofía nos fai repensar. Para escoitar estes programas podedes sintonizar as emisoras RadiONeria (107.8FM nas terras de Fisterra) e Radio Roncudo (106.1FM nas terras de Bergantiños) ou acceder aos podcast a través de Ivoox ([https://www.ivoox.com/podcast-podcast-programas-radio-roncudo\\_sq\\_f174839\\_1.html](https://www.ivoox.com/podcast-podcast-programas-radio-roncudo_sq_f174839_1.html)). ■

